



REPUBLIKA E KOSOVËS - REPUBLIKA KOSOVA - REPUBLIC OF KOSOVO
KËSHILLI GJYQËSOR I KOSOVËS - SUDSKI SAVET KOSOVA - KOSOVO JUDICIAL COUNCIL
PANELI ZGJEDHOR PËR ANKESA DHE PARASHTRESA
IZBORNI PANEL ZA ŽALBE I PREDSTAVKE - ELECTION COMPLAINTS AND APPEALS PANEL

ZL.Anr.332/2025

PANELI ZGJEDHOR PËR ANKESA DHE PARASHTRESA (PZAP), i përbërë nga gjyqtarët: Hajriz Hoti-kryesues, Bujar Muzaqi dhe Violeta Husaj Rugova anëtarë, duke vendosur përkitazi me ankesën e Fitim Bajrami, kandidat për anëtarë të kuvendit komunal në Komunën e Gjilanit, nga radhët e Subjektit Politik Lidhja Demokratike e Kosovës (LDK), të paraqitur kundër komisionerëve të Qendrës Komunale të Numërimit (QKN), në Gjilan, për shkak të parregullsive gjatë numërimit në Qendrën Komunale të Numërimit (QKN) për Zgjedhjet Lokale, të mbajtura më datë 12 Tetor 2025, në seancën e panelit të mbajtur me 25.10.2025, merr këtë,

V E N D I M

Hedhet e pasafatshme ankesa e parashtruar nga Fitim Bajrami kandidat për anëtarë të kuvendit komunal në Komunën e Gjilanit, nga radhët e Subjektit Politik Lidhja Demokratike e Kosovës (LDK), ZL.Anr.332/2025, datë 23.10.2025, e paraqitur kundër komisionerëve të Qendrës Komunale të Numërimit (QKN), në Gjilan, për shkak të parregullsive gjatë numërimit në Qendrën Komunale të Numërimit (QKN) për Zgjedhjet Lokale, të mbajtura më datë 12 Tetor 2025.

A r s y e t i m

Me datën 23.10.2025, PZAP-i ka pranuar ankesën e kandidatit për anëtar të kuvendit komunal në Komunën e Gjilanit, Fitim Bajrami, nga radhët e Subjektit Politik Lidhja Demokratike e Kosovës (LDK), me të cilën pretendon se ka dyshime në lidhje me procesin e numërimit dhe procesimit të votave të kandidatëve për kuvend komunal në QKN, për shkak të dyshimit të keqpërdorimit të votave, vjedhje gjatë numërimit, ku në fshatin Livoç i poshtëm nusja e tij kishte asistuar për prindërit e saj, dhe kishte marrur vetëm një vote. Po ashtu me tutje thekson se në fshatin Zhegër nuk ka asnjë votë, në fshatin Pograxhë ka zero vota, në fshatin Lashticë pretendon se iu kanë vjedhur votat, ndërsa në lagjen Bresale “Dheu i Bardhë” Perlepnice kishte vjedhje të votave.

Në përgjigjen në ankesë të Komisionin Qendror të Zgjedhjeve – KQZ, sqaron se bazuar në nenin 101 të Ligjit Nr. 08/L-228 për Zgjedhjet e Përgjithshme në Republikën e Kosovës (LZP), Rregulloren Zgjedhore Nr. 16/2024, Qendrat Komunale të Numërimit (QKN), Procedura e Veprimit në Qendrën Komunale të Numërimit për Zgjedhjet Lokale 2025, e miratuar më

01.10.2025, Nr.01/2601/2025, përcaktohet procedura e detajuar lidhur me procesin e numërimit në QKN. Rezultatet preliminare nga vendvotimet mund korrigjohen në Qendrën Komunale të Numërimit, në përputhje me paragrafin 3 të nenit 14 të Rregullores Zgjedhore Nr. 16/2024 për Qendrat Komunale të Numërimit (QKN). KQZ njofton se rezultatet përfundimtare të procesit zgjedhor, shpallen nga KQZ-ja pas përfundimit të numërimit të të gjitha fletëvotimeve nga vendvotimet e rregullta; fletëvotimeve nga votimi me kusht; fletëvotimet nga votimi i personave me nevoja të veçanta; fletëvotimeve nga votimi jashtë Kosovës; vendosjes për ankesat eventuale nga PZAP dhe Gjykata Supreme dhe pas përfundimit të të gjitha procedurave në QNR, ku rezultati i publikuar është i ankimeshëm nga subjekte politike dhe kandidatët të cilët kanë pretendime në raport me numërimin e votave të tyre. Pra, në momentin e publikimit të rezultateve përfundimtare nga KQZ-ja, palët e pakënaqura në pajtim me nenin 105 të LPZ, pala mund të ushtrojë ankesë në afatin brenda dyzet e tetë (48) orëve në PZAP. Andaj, pas analizimit të lëndës është vërejtur se pala ankuese ankesën e ka paraqitur jashtë afatit ligjor për paraqitjen e ankesës, sepse pas konfirmimit të ZEKKZ në komunën e Gjilanit, aktiviteti i QKN-së është përmbyllur me datën 18.10.2025, ditën e premte në ora 14:00, ndërsa pala ankesën e ka parashtruar me datën 23.10.2025. Pra nuk është brenda afatit ashtu siç parashihet me nenin 105, par.1 të LJP. Ankesat lidhur me administrimin e numërimit në QKN dhe QNR, dorëzohen me shkrim pranë PZAP-së brenda dyzet e tetë(48) orëve nga ndodhja e shkeljes se supozuar.

Paneli Zgjedhor për Ankesa dhe Parashtrës, pas shqyrtimit të ankesës dhe shkresave të lëndës vëren se ankesa është e pasafatshme

Në këtë rast, PZAP nga shqyrtimi i shkresave të lëndës, ankesës se ankuesit, përgjigjen në ankesë të KQZ-së vërtetohet se parashtruesi i ankesës ka dorëzuar ankesën me datë 23.10.2025, ku ka pretenduar se ka pasur parregullsi në numërim të votave, ndërsa sipas përgjigjes nga KQZ dhe provave të bashkangjitura procesi i numërimit në Qendër Komunale është përmbyllur me datë 18.10.2025, në ora 14:00.

Sipas Ligjit Nr.08/L-228 për Zgjedhjet e Përgjithshme në Republikën e Kosovës nenit 105 paragrafi 1, përcaktohet se *“Ankesat lidhur me administrimin e numërimit në QKN dhe QNR, dorëzohen me shkrim pranë PZAP-së brenda dyzet e tetë (48) orëve nga ndodhja e shkeljes së supozuar.”*

Po ashtu sipas nenit 9 paragrafi 5 të Rregullores Nr.01/2025 për Procedurat e Parashtrimit dhe Vendosjes së Ankesave të PZAP-it, përcaktohet se *“Personi mund të paraqes ankesë në PZAP, brenda dyzet e tetë (48) orëve për shkeljet e pretenduara.”* Ndërsa neni 13 paragrafi 3, i të njëjtës rregullore përcakton se *“PZAP-i e hedhë ankesën kur vlerëson se ajo nuk është dorëzuar në afatin e paraparë ligjor.”*

PZAP vëren se nga përgjigja e KQZ është vërtetuar fakti se aktiviteti i QKN-së në Komunën e Gjilanit, është përmbyllur më datë 18.10.2025, në ora 14:00, kurse ankuesi ankesën e ka parashtruar në PZAP me datë 23.10.2025, më ora 15.33 minuta, me çka vërtetohet se ankesa e

ankuesit nuk është paraqitur brenda afatit ligjor prej 48 orëve siç parashihet me nenin 105, paragrafi 1 të Ligjit për Zgjedhjet e Përgjithshme në Republikën e Kosovës.

Paneli, ka gjetur se ankesa e parashtruar nga kandidati për anëtare të kuvendit të komunës në Komunën e Gjilanit Fitim Bajrami, nga radhët e subjektit politik Lidhja Demokratike e Kosovës (LDK), për shkak të parregullsive në numërim të votave, është parashtruar pas afatit ligjor të përcaktuara me dispozitat e lartcekura, andaj PZAP vendosi që ankesa e ankuesit të hedhet si e pasafatshme.

Nga arsyet e theksuara më lartë dhe duke u bazuar nenin 105 paragraf 1 i LZP-së, nenit 117 paragrafi 3, dhe nenit 118 paragrafi 1 të Ligjit Nr.08/L-228 Për Zgjedhjet e Përgjithshme në Republikën e Kosovës, lidhur me nenin 9 paragrafi 5, nenin 13, neni 13 paragrafi 3 nën paragrafi 3.2 të Rregullës Nr.1/2025 për Procedurat e Parashtrimit dhe Vendosjes së Ankesave, paneli vendosi si në dispozitiv të këtij vendimi.

PANELI ZGJEDHOR PËR ANKESA DHE PARASHTRESA

ZL.Anr.332/2025, datë 25.10.2025



Këshillë Juridike: Kundër këtij vendimi është e lejuar ankesa sipas nenit 118 paragrafi 4 të LZP-së, në Gjykatën Supreme të Kosovës, brenda dyzet e tetë (48) orëve nga momenti i marrjes-pranimi të këtij vendimi.